



Ny "*Knotted gun*" ao amin'ny ONU New York

Io sarina basy mifatotra eo ambon'ny lohako io dia mitondra ny anarana hoe: "*Knotted Gun*" na koa basy mifatotra.



Yoko Ono sy John Lennon, manoloana ny Dakota Building ao Central Park, New York, nipetrahan-dry zareo. Tao i Mark Chapman no nitifitra nahafaty an'i John Lennon, ny harivan'ny 8 Desambra 1980.

Izy io dia sanganasan'ilay teratany avy ao Suède, Carl Fredrik Reuterswärd na Carl Reuterswärd fotsiny, sady mpanoratra no artista mpanao sary sokitra. Taorian'ny nitifiran'i Mark David Chapman an'i John Lennon (iray amin'ny tarika anglisy malaza eran-tany Beatles), ny 8 desambra 1980 tao Central Park New York, dia niangavy azy i Yoko Ono -vadin'i John Lennon-hamorona sangan'asa mitaratra ny fijerin'ilay maty izany fandriampahalemana maneran-tany izany sy ny atao hoe "*Non-Violence*" (tsy fisiana erisetra).



I John Lennon moa namana tena akaikin'i Carl Reuterswärd raha teo ka tsy nisalasala ity farany nikelrika ka dia io *"Knotted Gun"* io no vokany, izay nalaina tahaka tamina basy **Colt Python 375** . Vao vita

izy io dia napetraka teo anoloan'ny tranon-dry John sy Yoko ao Strawberry Field, Central Park, New York ilay *"Knotted Gun"*



Telo no tena sanganasan'i Carl Reuterswärd mitovy amin'izy io, mirefy 1,50m. Ny voalohany napetraka eo anoloan'ny garan-dalamby ao Malmö (Suède); ny faharoa nomen'ny governemantan'ny Luxembourg an'ny Firenena Mikambana ao New York, ary ny fahatelo dia napetraka ao amin'ny Komisiona Europeana ao Luxembourg.

Ny taona 1993 dia lasa fanevan'ny Ong *"Non-Violence Project Foundation"* (Fikambanana tsy miankina miady ho an'ny tsy fisian'ny erisetra) ilay izy. Izy ity dia natsangana hampianarana ny tanora hamaha olana am-pilaminana, am-piresahana fa tsy amin'ny alalan'ny erisetra.

Nisy ihany koa “*Knotted gun*” fa kely refy napetraka ao amin'ny zaridain'ny “*Skissernas Museum*”, ao Lund any Suède.



Amin'izao fotoana izao dia toa miisa 30 ny dika mitovy (“*répliques*”) an'io sanganasan'i Carl Reuterswärd io, izay miparitaka maneran-tany mihitsy. Ny taona 2003 dia nanokatra vinan'asa ny fikambanana “*The Non-Violence Project*”. Inona, hoy ianareo ? Ny hisiana dika mitovy amin'ny Basy mifatotra io ao amin'ny firenena tsirairay avy maneran-tany.



Ny 3 mey 2016 i Carl Fredrik Reuterswärd no nodimandry teo amin'ny faha-81 taonany, tratry ny AVC (“*accident vasculaire cérébral*”). Tapaka lalan-drà raha adika mivantana. Ny sangan'asany kosa dia hitoetra mandrakizay ary hiroborobo maneran-tany mihitsy aza.



Mercredi, 21 Septembre 2022 10:00 - Mis à jour Mercredi, 21 Septembre 2022 10:54 (Image: Imagine "mirain'i John Lennon" (na am-pilaminana))